

四庫全書

史部

欽定四庫全書

史部

雲南通志卷二十九之五

詳校官給事中_臣李臺

刑部郎中_臣許兆椿覆勘

總校官知縣_臣楊懋珩

校對官中書_臣張曾炳

謄錄監生_臣安宇樂

欽定四庫全書

雲南通志卷二十九之五

奏疏

本朝二

請題免白土軍丁銀疏

總督 高其倬 奉天

滇省丁銀額重小民苦於輸將前臣等會疏題請
經部議准將民丁丁銀攤入地糧完納竝查無主
影射者將軍丁之最重者量加攤除當即檄行布

政司清查在案茲據署理雲南布政司印務按察使江芑詳稱滇省山多田少無主影射田土寥寥無幾以之攤抵軍丁尚屬不敷更有太和縣白土軍丁一項係前明萬厯年間因賓川州鐵鎖箐夷人作亂暫令賓川州趙州雲南縣太和縣四處民人撥防大理府城池遂立太和所名色至我

朝順治十六年已將賓川州趙州雲南縣三處土軍俱准復歸民籍惟太和縣土軍二百五十二丁又

鄧川州土軍二十六丁浪穹縣土軍二十五丁每
丁派銀一兩報入徵冊嵩明州土軍一百二十一
丁因嘉靖年間安酋作亂挑撥州民協幫尋甸守
城名為鳳梧所編出土軍一百二十一丁每丁納
銀一兩俱係州民並非承種軍田之丁再查鶴慶
府土軍一百零八丁亦因鐵鎖箐夷人作亂將太
和縣民撥守鶴慶禦又分防劍川浪穹隨編為鶴
慶土軍伊等在劍川浪穹開墾久荒田地納糧編

丁禦官復科使費一百零八兩裁禦歸府竟將一百零八兩之私派編作人丁一百八丁每丁納銀一兩載入正賦是伊等已納錢糧丁差復納此額外土軍之丁銀重累難堪至騰越州土軍丁三百七十三丁上納丁銀三百七十三兩其立名受累情由與鶴慶土軍事同一例以上太和縣嵩明等六府州縣共編土軍丁九百零五丁查屯丁每丁納銀六錢二分二錢八分不等獨此項土軍每丁

納銀一兩其賦重倍於屯軍且軍民各有一差獨
此軍既當民差又當軍差是役之重又加倍於軍
民詳請題豁臣覆查無異伏思滇省六屬之白土
軍丁銀九百餘兩以明末之流弊重役累民臣何
敢壅於

上聞所當

題請豁免伏乞

皇上睿鑒施行

籌酌魯魁善後疏

高其倬

為詳籌永遠寧謐之策以除野賊積患事竊照雲南魯魁野賊為害地方情節及各大頭目現就拘繫勦捕經臣另疏詳

奏在案若不趁此剿捕既施之後詳籌調劑雖目前暫安難期永遠寧貼欽惟我

皇上聖神文武中外乂安乃猶

宵旰孜孜勤求治理臣荷封疆之寄千載一時何敢因

循故轍苟了目前仰賴

日月之燭照不避紛更之小嫌謹隨地方形勢就

臣愚

昧所知籌酌數端冀得永除野賊之患稍靖地方

所有各條謹臚列於後 一雲南歷來野賊頭目

平時皆居元江新平之間若一經生事官兵剿捕

則遁入威遠土州及普洱茶山等處蓋因素係伊

等瓜分討保之地夷民歲歲納銀如同租戶甚至

井鹽挨日收課商茶按駄抽銀客賈猥民任其指

使供給食米傳報聲信官兵所向賊已早知消息賊衆所潛官兵難得踪跡所以查拏不易剿捕頗難今雖加懲創目下暫安若不趁此安營設防為經久之計空虛之地廣袤二千里內通哀牢外略異域無兵控壓必仍為野賊暗佔每年索保可得萬有餘金以此招養賊黨必將復聚為患臣細籌形勢應添設普威一營置叅將一員守備二員千總四員把總八員兵丁一千二百名令叅將帶

兵五百名駐劄普洱令守備一員帶兵三百五十
名駐劄威遠又守備一員帶兵三百五十名駐劄
茶山其餘汎地量分千把帶兵防守內制野賊外
控土司再加以負弁得人整頓不急則此一方野
賊之患自可消弭矣 一野賊巢穴根株全在元
江協新營所轄之地向來營制新舊一營止屬
臨元鎮管轄與元江協無屬故元新兩界之間一
有事端未言勦捕先爭交界互相推卸遲誤事機

比及用兵又復參差前後呼應不靈臣請將新舊

一營及所擬新設之普威營一併皆歸元江協管
轄仍令臨元鎮統轄則聯絡一氣功過相關於調
遣巡防均屬便利矣一威遠土州之地包魯魁

哀牢西南一面歷來為野賊逋逃之藪野賊敢於
恣肆者固由文武玩愒然亦以有此威遠一路可
逃及威遠土官可恃也威遠土知州刀光煥平日
苛索多端夷民苦累此次又隱藏野賊通風餽食

令其實報屢檄不遵經臣一面摺

奏拘拏一面發藩臬二司秉公詳審容臣另行具

題外威遠土州應請改土歸流一則雲省門戶堅完

再則夷民如出水火其地請設撫夷清餉同知一

員兼管鹽井經歷一員兼管司獄事井大使二員

分管按板抱母及各處土井煎辦鹽斤再猛班地

方離威遠三百餘里應設巡檢一員就近辦理民

事令各員盡革土司歷來苛派項款與民休息自

此以漸化導整頓則歷來野賊棲託之藪可漸變成內地而夷民永遠得免土司苛派之苦再查威遠乃極邊瘴癘又係初闢之地各負請照例揀選調補以三年為滿如果稱職請照麗江府改流之例保

題陞用以示鼓勵則新設之負益加奮勉矣 一楊方普李四姓土官向係招出賊目授以土職原期約束夷人安靜地方今既不能約束族舍反聽藉

勢為非

聖朝名器何可濫加查李姓土職久因犯罪革除外此
次糾衆騷擾者皆方普二姓族人及其項下夷猓
方普二姓土巡檢先事不行鈴束事後不能捕擒
甚屬溺職查方紹祖普成忠皆屆請襲之年現在
請襲應請永遠停其承襲以示懲創又土縣丞楊
世恩此次野賊之內無伊宗族一人亦無伊屬夷
猓又親率土練隨官兵深入勦捕應仍留其世職

以示獎勸 一各處既擬設官添兵則俸薪兵餉
以及役使等項均需支給雲南歲歲借他省之協
濟豈容更增繁費查威遠之新開按板抱母二井
前於遵

旨覆奏鹽務利弊事案內計一年可出鹽三四百萬斤
請以所出之鹽分銷各屬可以平減通省鹽價今
黑井已經加腳減價白井已有沙滷分銷景彌雲
阿四小井其價原不過昂惟琅安二井之鹽消售

於臨安等處者其價稍貴今又有新經查出麗江之井可出鹽息二千二百餘兩將此減抵其價亦平除於鹽政內另行具

題外查按板抱母二井從前為野賊及土官土棍所踞不但無分釐歸公兼之野賊騷擾商販亦裹足不前今經驅除整頓商販流通計一年約可出鹽四百餘萬觔可獲息銀二萬餘兩以充兵餉可以不用另行請增再普洱一帶又報出土井數處向

亦因野賊阻撓擅利自肥今現陸續清查整理可
將所出一併添助創設之費至兵米一項元江威
遠普洱皆產米之鄉應就近籌撥可也 一施和
尚之姪膩勒糯利糯片等向來亦非安靜之人此
次施和尚被殺膩勒等皆隨官兵奮勇按捕賊黨
頗為盡力應寬其既往但若縱令仍各居遠寨漫
無稽查亦恐將來滋事臣請將膩勒糯利糯片等
并其妻子皆令移入元江府城居住凡有出入皆

報明文武官庶該管各官得以稽查拘束而夷目
本身家口俱在城中知所顧畏必不敢為非矣

一威遠土官刀光煥及其犯事子弟將來若仍令

留居故土必致鼓惑滋事請將其家口移至省城

安插

臣

酌量料理給以恒產俾令得所則萌蘖不

滋豐端俱息矣

一向來元新一帶猺夷習於討

保之風其頭目每年所得成千累百名曰年例錢
其後生每年出外一次亦各得三四十兩名曰鞋

腳錢且所到之處醉酒飽肉滿意而歸利之所在趨之若鶩更兼元新各寨多係各目故居其餘零星小寨亦各有頭腦耳濡目染以為徒手可以致富常思起而效之若不嚴加防範難必其故態不萌查各野賊出入有地討保有時九龍江口是其入土司之要道請於九龍江口相近扼要之處及各渡口俱設汛盤查或江外之猺夷欲往江內江內之猺夷欲往江外者皆令該管官給以印票載

明人數如山海關之例往還按數稽查即茶山客商及官弁所差兵役俱一例盤查以嚴出境滋事之弊再元江新平所屬村寨俱令地方官做保甲大意編立里甲記其人戶名口歷來野賊討保必在秋成之後請每年令地方官於十月十一十二正月四個月之內不時親往稽查如出外者多必係索保務行跟究懲處不令稍有脫漏則要路之出入既嚴地頭之稽查又密形格勢禁自不敢為

非行之既久積習漸除餘患自消矣 一威遠土
州向來土官不容夷人應考恐其入學與之抗衡
又同族為婚者甚衆倫紀未明除同姓為婚已飭
該管官諭禁臣又與撫臣楊名時嚴飭各員勤講
聖諭加意化導以變猥俗請再於威遠設立義塾數處
令夷人子弟有志讀書者入塾誦習先暫令於元

江附考請

勅學臣就其粗通文義者量於元江額外取進二三名

以示鼓舞俟人文漸盛再請設學庶獮俗自變文
明日啓矣 一威遠土州向來差發甚少其田土
所出盡為土官苛派入已令臣已令大理府同知
佟世蔭守備楊國華將其田畝及各項錢糧逐一清
查凡有土官額外苛派之項行令盡數裁革其應
增納正額亦令酌照地之肥瘠更定賦額以資經
費再查得威遠普洱九龍江等處土田之美大勝
雲省腹內之地其山頂多水其禾一年兩熟然猶

拋荒甚多者一以土夷人少不能遍耕再因野賊騷擾歲無寧宇若使土田盡闢不但軍糈足資更可化為樂土其間尚有可開設州縣之處但目下人戶稀少江邊烟瘴未消未可驟言應籌之以漸臣已與撫臣楊名時令各地方官加意勸誨本處夷民廣行耕植又令招徠別處願墾誠實之民赴彼墾種請照雍正元年定例旱田十年陞科庶人烟漸盛嵐瘴自消居民愈多則賊風愈息矣 以

上十條臣就一得之愚籌酌調劑謹會同雲南撫

臣楊名時提臣郝玉麟合詞具

題伏乞

皇上睿鑒勅部議覆施行

耕藉田謝恩疏

總督
鄂爾泰滿洲

欽惟我

皇上

仁育蒸民

孝先天下

三推開九推之首禮重貴農

千畝為百畝之倡情通報本

特舉躬耕大典表正羣生

欽頒壇祭鴻儀曉茲兆庶以

天子而親耒耜孰敢不勤於耕本

至尊而潔染盛誰能不興於孝自督撫以及郡縣衛所

盡屬守土之司由京畿而逮東西朔南通行耜田

之禮此誠百王未有之曠舉實為萬世不易之隆
規也臣等身任封疆職司表率雖滇黔在萬里之
外僻近蠻荒而苗獠處異類之儔咸知耕鑿仲春
方屆陽氣正舒吉亥既臨土膏初動彼其之子皆
秉耒於東郊乃如之人同俶載於南畝豈獨山農
石戶固訝所罕聞即使縉紳士夫猶茫然失據於
是敬宣僚屬相與遍諭農人俾知

聖天子本此仁孝之思躬先迪勸咸願爾億兆體其誠

敬之意同慶屢豐

帝曰百工欽哉予一人為天下臣民祈

天而永命民曰

皇恩大矣我百姓願

元后父母壽考以無疆臣等無任激切屏營之至

請添設東川府流官疏

鄂爾泰

為請設流官以安邊圉事竊照東川一府奉

旨改歸滇省一切事宜應另為措置庶漢夷相安地方

寧謚

臣

於去冬赴黔審理兇苗川販事畢由威寧

而抵東川雖城垣傾圯人戶蕭條然觀其山川察其形勢按其疆畝查其厥地固膏腴之府物產之區也東至烏撒西至會川南至尋甸北至烏蒙西北至會理東西廣四百二十里南北袤三百七十里周圍延袤一千七百餘里前有金沙江後有牛欄江復有五龍納雄馬鞍雲弄諸山羣峯環峙坡阪宜蕎原隰宜稻田高水活旱澇無恐緣歸流之

後仍屬六營盤踞諸目逞兇歲遇秋收輒行搶割
故改土三十年仍然為上酋所有仰荷

聖主仁威雖各加整飭共知惕慄但地方遼闊營長火
目侵占田畝私派錢糧甚至縱夷劫殺綁擄平民
實非一知府一經歷所能遍理查巧家一營逼近
烏蒙去府寫遠歷遭烏酋踐踏應立一縣將馬書
弩革米糧壩以扯汎等處歸并管轄者海地方素
通烏蒙暗行不法應將縣典史移駐者海將革舍

阿固伙紅等處歸併管轄又補地方亦離府治百
里山深箐險應設巡檢一員將五龍界七法戛等
處歸併管轄則補地方遠在江外亦設巡檢一員
將阿木可徂普毛杉木箐等處歸併管轄如此則
凡緊要地方俱有職員分理墾田開廠協理有人
而營長火目改立鄉約保長一體編甲稽查嚴密
漸染亦易二三年後東川將為樂土矣如蒙

聖恩俯允所設縣治并請

欽賜佳名知縣巡檢并懇

勅部鑄給印信以專職守

臣

更有請者東川改土以來

於康熙五十九年間

題請照中學例歲試取進文武童生各十五名建造
文廟學舍春秋祭祀其教職諸事令知府暫行兼攝
補廩出貢部覆俟數考後另疏

題請查知府有地方民社之責何能兼司訓迪自應
添設教授一員給以印信專司學校其應試文武

童生現在無多各取進十五名徒滋混濫應請暫
照小學例各取進十名俟後人文漸廣再議加額
并應補廩出貢及新設縣治亦添設教職之處一
併

題請庶開導用勤觀摩斯奮俾羣知入學為榮進身
不易或亦鼓動邊夷之一道也至建造衙署添設
書役工食應將何項動給俟酌妥估計另行造冊
具

題合併聲明

臣

謹會同署理雲南巡撫臣楊名時合

詞具

題伏乞

皇上睿鑒勅部議覆施行

請添設維西營制疏

鄂爾泰

看得中甸一區為雲南西面藩籬延袤二千餘里
應設官兵以資控制經前督臣高其倬

題明俟川雲兩省各遣大員將巴塘中甸所屬之地

會查明白然後酌定添設官兵確數今阿墩子等處既奉

旨歸滇地方更為遼闊應於適中處所安設一營餘量

地方之大小要隘分防設汛以專責成

臣

查中甸

雖地大民衆但天氣寒冷不能種植維西一帶天氣和暢又內接鶴麗鎮劍川協之汛防外通西藏實屬緊要之區應於維西建立大營設叅將一員帶千總一員把總一員兵丁四百名駐劄控制中

甸地方亦屬緊要應設守備一員帶把總一員兵丁二百名駐劄防汛中甸之格咱地方乃通裏塘之大路應設兵五十名防汛奔子欄渡口設有船隻應設把總一員帶兵五十名駐防其宗喇普二處係塔城關之大路應各設兵五十名防汛阿墩子雖為要路而地隘民稀難容多兵應設千總一員帶兵一百五十名駐劄防守阿墩子以外之浪滄江有溜桶船隻為通西海要路應設把總一員

帶兵五十名駐劄防範以上計設叅將一員守備一員千總一員把總四員馬一步九戰守各半兵丁一千名方足控禦蒙番彈壓地方其備弁兵丁統屬於維西營之叅將而叅將仍聽鶴麗鎮統轄則聲勢聯絡呼應得靈但既議設兵必須籌餉查雲南鶴麗鎮設兵二千八百名較各鎮多兵四百名者原為接壤蒙番防汎金江而設是以沿江之石鼓阿喜一帶安設汎兵一千六百名之多又劍

川協設兵一千名亦因界連番地之故該協之拖
枝汎離維西僅二十里今維西既安大營中甸各
處又已設兵則鶴劍俱為內地鶴鎮沿江及劍協
之拖枝等汎可以不必多兵應於鶴麗鎮抽兵四
百名劍川協抽兵二百名共抽兵六百名尚少兵
四百名前督臣高其倬曾有援剿兩協裁增之議
援剿左右兩協原每協設馬二步八合戰兵二千
名除撥歸楚姚景蒙東川等處兵丁外每協尚有

馬兵三百二十名步兵一千一百七十名與原設馬二步八之制不符應於兩協內共裁馬兵一百名步兵一百八十名改為馬一步九戰守各半兵丁四百名撥歸維西營餉銀移彼就此已敷給放其所設維西營官弁亦應於內地酌量裁調查援勦兩協原係每協分為二營設副將一員遊擊二員守備二員千總四員把總八員經前督臣高其倬於請酌增楚姚鎮兵等事案內業已裁去左協

遊擊一員守備一員千總一員把總二員又裁去
右協遊擊一員千總一員把總二員今應裁右協
守備一員兩協千總各一員把總各二員撥補維
西營是維西營止須另補叅將一員所有備弁均
毋庸另設一轉移間內外之營制俱宜而兵餉不
致增添庶於邊疆有益臣謹會同吏部尚書以總
督管理雲南巡撫事務臣楊名時駐劄大理府雲
南提督臣郝玉麟合詞具

題伏乞

皇上睿鑒施行

請設烏蒙府文負疏

鄂爾泰

為欽遵

上諭請設文負事竊照烏蒙鎮雄既經奉

旨改土歸流并歸滇省管轄除應移鎮安營裁調官兵
添設之處現在另疏具

題外所有應安設文負駐劄各地方總理分理之處

臣隨悉心籌畫廣詢博採務求妥確今據永昌道賈擴基東川府知府黃士傑威寧府知府楊永斌署烏蒙事正大營同知耿觀謨署鎮雄事尋甸州知州崔乃鏞候補知縣朱繡等會同武員屢經踏勘次第詳報到臣臣按其情形察其險要復與各員會商確議酌定規模仰候

聖裁謹議得烏蒙鎮雄緊相接壤地方千有餘里而烏蒙地勢尤廣請仍設為府治查烏蒙地界有上方

下方之別其上方扼要之地為天砥而烏蒙小烏
蒙魯甸女補奎米貼等處皆屬上方土府舊治并
無城郭查天砥去舊治七里軒敞寬平可建城垣
應設知府一員總理郡務其下方扼要之地為大
關垞而小關豆沙壩鹽井渡梅子溝以及水旱十
八站等處均屬下方去府窺遠應設通判一員駐
劄於此分理郡務又米貼地方去府治西北三百
里去大關垞東南四站踞金沙江之上流扼大小

涼山之喉項控馭險要應設知縣一員駐劄於此
總理縣務又魯甸地方係祿鼎坤舊地分轄諸夷
總領各目地接東川夷獮雜處應設巡檢一員駐
劄於此以司門戶以察往來又鹽井渡地方遠通
川省近接鎮雄商賈叢集課賦攸關奸販狡夷往
來出沒亦應設巡檢一員駐劄於此以司鹽務以
察奸宄又設經歷一員同駐府城供知府調遣設
司獄一員專管監獄設知事一員佐通判稽查設

典史一員備知縣調度兼理獄務又於府治設教
授一員縣治設教諭一員分司訓迪此烏蒙應設
之官制也至於鎮雄較烏蒙稍隘請改為州治查
鎮雄地界總計有三股一為彝良八火頭一為威
信十三白勒一為母享七火頭而烏通山居三股
之中乃總會之地背山面河為土府舊治亦無城
郭今請稍移而南建立城垣設知州一員總理州
務設吏目一員以董馘囚其彝良地方為八火頭

之最曠土荒田可備開墾鹽井鑛廠可資食貨而夷獮雜居頑梗盤踞號為衝繁應設州同一員駐劄於此分理州務其威信地方為十三白勒之最通川省之門徑傍烏蒙之藩籬總天蓬諸寨之要隘握白水三江之咽喉應設州判一員駐劄於此藉為後障其母享地方為七火頭之最逼近永寧路通商賈緊接州治呼吸相關應設巡檢一員駐劄於此以為內藩又設學正一員以司訓誨此鎮

雄應設之官制也以上烏蒙一府應設文官十一
負鎮雄一州應設文官六負俱歸烏蒙府管轄現
今兩處各需負任事臣看得順寧府知府陸世宣
雖到任未久然操守謹飭才具強幹且籍隸四川
熟悉土夷情事曲靖府通判徐德裕辦事精勤不
避勞怨屢經差委皆有條理候補通判蘇暲年力
精壯堪以佐理廣通縣知縣杜思賢才具明晰辦
事老成昆明縣縣丞張浩炎方驛驛丞許燮俱辦

事能幹相應請

旨將陸世宣調補烏蒙知府徐德裕補授鎮雄知州蘇
暲補授大關通判杜思賢調補米貼知縣張浩陞
補彝良州同許燮陞補威信州判均屬人地相宜
陸世宣杜思賢係對品調用蘇暲係

命往人負張浩許燮係請補佐貳官俱無庸送部引

見徐德裕俟赴新任辦理就緒再給咨赴部引

見其經歷知事巡檢典史等官臣已另行選擇咨部調

補各教官聽撫臣考驗選補府州縣文武童生暫
照小學例各取進十名俟人文漸廣再議加額此
二處實係邊方要地所設各員請以三年為滿果
能稱職保

題陞用以示鼓勵各員缺俱於本省揀選調補至於
應徵地田錢糧人民戶口并各員管轄界址建造
衙署官俸役食以及鹽井銀銅各廠作何調劑之
處俱現已委員分勘清查確估俟冊報到日聽撫

臣另行具

題所設府州縣三治并請

欽賜佳名以昭

聖化各負應給印信統請

勅部鑄給以示信守

臣

謹會同雲南撫臣朱綱合詞具

題伏乞

皇上睿鑒勅部議覆施行

恭報慶雲疏

三省總督鄂爾泰

為恭逢

聖誕慶覲祥雲事雍正六年十月二十九日恭逢

萬壽令節臣率在省文武官負人等在五華山朝

賀畢坐班至辰刻共覲五色卿雲光燦捧日經辰已

午三時至十一月朔絢爛倍常凡呈現兩日臣尚

以為省城所見其他郡邑未必同然隨經行查去

後適據楚姚鎮總兵官張應宗呈報恭逢

皇上萬壽本職率同在城文武大小官負以及合郡紳

耆兵民人等恭詣

龍亭朝

賀坐班仰見

上天垂象卿雲滿佈祥光五色擁護日邊從辰至午燦爛
非常初一日午時煥麗更勝文武兵民咸稱歷來
未覩齊祝

萬壽無疆所關

盛朝祥瑞理合具文呈報又據雲南布政使張允隨

詳稱查據楚雄府楚雄縣廣通縣姚安府姚州大姚縣定邊縣等處先後呈報恭逢

皇上萬壽聖節喜見卿雲五彩擁護日邊經辰巳午三時於十一月初一日午時又復光華照耀衆目齊觀不勝歡忭此從古未有之殊觀曠代罕聞之盛事幸生

聖世得覩其祥伏祈轉詳各憲等情到司伏查省城乃全滇之會楚雄為西迤之中忻逢五色祥雲正當

萬壽令節此誠嘉徵上瑞罕見稀聞理合詳請祈轉
奏等情到臣欽惟我

皇上

功參化育

德備中和

至誠昭格於幽明敬

天法

祖深仁廣沛於遐邇懷德畏威四表被

光華時徵上吉八方荷

丕冒疊見奇祥前此璧合珠聯羣識

天心之昭監嗣聞河清海晏盡知

地祇之効靈若夫慶雲之瑞正值

聖壽之辰則實從古迄今未經再見者也

臣謹按黃帝

有景雲之應虞舜有卿雲之歌瑞應圖曰慶雲者
太平之應孝經援神契曰天子孝則慶雲見春秋
感精符曰南至有雲迎日年豐之象再考雲南通

志漢武元狩元年有五色雲見於白崖遣使跡之
置大理屬之雲南縣雲南由是得名其後歷晉唐
宋元史不再書至明洪武嘉靖間五色雲見於永
昌其餘或一二見半屬彩霞亦不移時而散惟我
聖祖仁皇帝二十一年五月彩雲見於雲南縣十月五色
雲復見於楚雄府是年雲南悉平歷數從前要皆
太平寧謐時和年豐之兆至於恭逢

聖誕呈現三時歷現二日稽諸簡冊從來未有如

今日者也此蓋伏遇我

皇上大孝格

天與穹蒼而協撰至明如日竝雲漢以昭回先天後天合
德而自呈符驗陽月良月應時而迭著庥徵非霧
非烟霽霽皇皇文垂有爛如紈如綺繽繽郁郁瑞
靄無邊覩盛事於五華鸛鷺貌貅宛在蓬萊之島
紀嘉辰於六詔山川城郭畢收圖畫之中兒童引
領以稱奇父老駢肩而誌喜屢豐豫卜願大有遍

一十五州衆口同聲祝吾

皇臻萬八千歲臣無任踴躍歡忭之至相應恭疏

題報伏祈

皇上睿鑒施行

請添設普洱流官營制疏

鄂爾泰

為逆夷已靖謹籌建置事宜仰祈

睿鑒事竊照雲南元江府所轄車里茶山地方幅輳遼闊至二千餘里擺夷窩泥等狡詐獷悍反復靡常

今橄欖壩逆夷兇頑橫肆雖復仰仗

天威勦撫兼施悉已平定但極邊瘴癘之區逼近交緬
莽藪諸外域若不設重兵彈壓設專司調劑恐革
心不易善後終難臣等詳求一勞永逸之計細籌
分防阨要之宜看得車茶十二版納原俱隸宣慰
司管轄該土司刀金寶自以不能兼顧以致屬夷
肆橫據請分設流官實於地方有裨應將思茅普
藤整董猛烏六大茶山及橄欖壩六版納歸流管

轄其餘江外六版納仍隸宣慰司經管劃清界址
造冊達部查普洱距元江府八站原止設通判一
員竝非正印請於普洱設知府一員鈐束化導并
管徵解錢糧地方諸務設經歷一員看守倉庫禁
獄兼司緝捕思茅接壤茶山係車茶咽喉之地請
將普洱原設通判移駐思茅職任捕盜經管思茅
六茶山地方事務從前販茶奸商重債剝民各山
壟斷以致吏民情急操戈查六茶山產茶每年約

六七千馱即於適中之地設立總店買賣交易不
許客人上山永可杜絕釁端客商買茶每馱酌納
茶稅銀三錢令通判管理試行一年之後徵稅若
干定額報部再臣等原議橄欖壩擬設知州一員
今查橄欖壩本地烟瘴實甚未便駐兵緊接橄欖
壩之攸樂地方以高瞰下最為扼要亦且涼爽現
議於攸樂設遊擊一員駐劄防範文職設同知一
員與之同城分理地方事務並管各版納鹽井督

煎辦課亦俟試行一年之後徵課若干定額報部
設鹽課司大使二員一駐猛烏兼管烏得鹽井一
駐整董兼管磨者鹽井同知通判經歷司鹽大使
等員俱隸普洱府屬轄如此則府治既定官守釐
然矣普洱改設府治除原有通判一員外應添知
府一員同知一員經歷一員鹽大使二員再普洱
所屬原有生童從前皆赴元江府考試今既改府
當另設學校教職應於元江府學調撥訓導一員

董率啓迪前在元江府入學者撥歸普洱府學其
童生入學名數照滇省小學事例俟人文漸盛之
後另請廣額又邊方營制所以建威消萌最關重
大車茶一帶舊隸元江協管轄屬臨元鎮節制汎
地遼闊額設兵丁一千名實不能兼顧雖後添設
普威一營兵丁一千四百名然自普洱以外鎮沅
威遠恩樂等處俱經改流創設府州縣制若再以
六大茶山竝各版納地方悉令管轄固屬地廣兵

單難以分佈即便添兵仍歸臨元鎮節制亦屬鞭
長不及萬難控馭臣等原議擬將元江協副將改
設普洱恐猶不足以壯聲勢而濟緩急也今悉心
酌議請將元江協竝普威營俱行裁汰即添設一
鎮分為中左右三營元江協亦改為一營遊守千
把俱照營制共設兵三千二百名元江鎮沅普威
車茶等處俱令統轄分汛防守總兵帶中軍遊擊
一員守備二員千總二員把總四員馬步兵丁八

百名駐劄普洱與知府同城元江營遊擊一員帶
千總一員把總二員馬步兵丁五百名駐劄元江
左營遊擊一員帶千總一員把總二員馬步兵丁
三百五十名駐劄威遠左營守備一員帶把總一
員馬步兵丁二百名駐劄鎮沅與知府同城千總
一員帶馬步兵丁一百名駐劄恩樂與知縣同城
右營遊擊一員帶千總一員把總二員馬步兵丁
五百名駐劄攸樂與同知同城右營守備一員帶

把總一員馬步兵丁二百名駐劄思茅與通判同
城千總一員帶兵一百五十名駐劄慢額兼防橄
欖壩把總一員帶兵五十名駐劄猛養千總一員
帶兵一百名駐劄倚邦內撥兵二十名護守磨者
鹽井把總一員帶兵五十名駐劄慢林兼防小猛
崙把總一員帶兵五十名駐劄猛烏把總一員帶
兵五十名駐劄整董其猛旺等小汛渡口十處共
安兵一百名所議新設之鎮應裁元江協副將一

負普威營叅將一員除元江普威原有守備三員
千總六員把總十二員今安設一鎮四營應添總
兵一員遊擊四員守備一員千總二員把總四員
議設兵三千二百名除元普二處原有兵共二千
四百名外需添兵八百名查大理城守營原設守
兵一千名竝無馬兵一切巡查差遣俱有未便且
守兵例不拔補把總該營兵丁亦無進身之路應
減去二百名改設馬戰兵八十名步戰兵一百二

十名守兵六百名共八百名照雲南城守營之例
提標五營額兵四千名內馬兵一千名步戰兵三
千名原與馬二步八之營制不合今應於馬兵一
千名內減退二百名充入步伍於步兵內減退四
百名改為守兵歲計節省銀共六千一百兩有零
又臨元鎮營制額兵二千二百名止該馬兵二百
二十名今有馬兵二百四十名亦應減去二十名
充入步伍以昭畫一歲可節省銀三百七十兩有

零是提鎮兩標兵數無減差遣如常而所節省銀兩每年可敷四百兵之餉即可招兵四百名此外尚應添兵四百名查西藏用兵滇省共派出三千名欽奉

聖旨著額外添補三千名臣因不需多兵止合招補一千五百名業經咨部在案今洛龍宗之兵三千名先已撤回前留察木多之兵一千名亦現在檄撤所有額外招補之兵自應陸續裁汰以符舊額請

即將此新招額外兵丁就近酌撥四百名歸入新鎮標下以足其數至歸流版納應徵錢糧秋米等項統容確查分晰造冊報部新附地方得人最要必須精明強幹熟悉情形而又廉謹老成之員始可以任撫綏而資控制所有新設文武各員另疏題補再修建城垣衙署兵丁房屋等項飭行確估一面興工動用銀兩另行報部核銷合併聲明臣謹會同雲南撫臣沈廷正駐劄大理府雲南提督臣

郝玉麟合詞具

題伏乞

皇上睿鑒勅部議覆施行

報南掌國進貢疏

鄂爾泰

為

聖德遠屆外國輸誠謹恭疏

題報仰祈

睿鑒事雍正七年六月二十九日據雲南臨元鎮總兵

官邱名揚呈稱雍正七年六月十一日據汎防猛
灑目兵康天錫蘇鳳彩等稟報五月初六日老撾
南掌國王子島孫差叭目五名先目十二名後生
八十名備象二隻進貢

天朝懇求總督轉達理合稟明本職即差千總亶國鑑
竝思茅土目刀興國前往江壩一路接應照管來
差頭目人等撥備兵夫護送前來等情又據前委
協辦軍務之元江府知府遲維璽報同前事竝准

撫臣沈廷正臣隨會檄雲南布政使張允隨備
辦犒賞供應等項令知府遲維璽照管來省竝檄
總兵官邱名揚如土目土兵內有願留在思茅等
候者水土不服亦不必相強仍照常供應去後續
於閏七月初一日據總兵官邱名揚知府遲維璽
呈稱探得老撾進貢人等於六月初三日到內地
整歇地方於七月初六日到關坪地方至閏七月
十五日據南掌國蘇嗎喇薩提拉島孫差頭目叭

猛花叭猛腊叭細禮松發帶先目人等捧銷金緬
字蒲編表文一道赴車里思茅地方軍營投見備
極誠懇隨即勞慰賞賚伊等合掌叩頭於二十日
職帶頭目叭猛花等自思茅出普洱會同元江府
知府遲維璽就公所整肅威儀示以體統復又從
優賞賚隨令通事詢問據稱小的們南掌地方接
連車里邊界去年有橄欖壩擺夷多事逃至南掌
猛灑地界官兵追到並不擾害村寨並不妄殺一

人又聽得漢人們說

天朝

皇帝仁明海外遠人無有不服黃河水清了數月我南
掌主子說黃河再不聞清今黃河水清一定是

大聖人掌天下因此差來進貢備象二隻蒲編金字表
文一道懇求總督

奏達見我主子遠來的心等語又問來差金字表文
為何寫在蒲葉上據稱小國沒有紙敬天敬佛纔

用蒲葉寫金字若文書用芭蕉葉寫字其餘俱竹
片子寫字這蒲葉金字進貢

皇帝與敬天敬佛一樣等語差目內有不服水土者留

在思茅等候大頭目等令元江協把總陳綸等率

兵伴送隨知府遲維璽赴省聽候等情

臣

於閏七

月二十六日行至江西坡地方據報該八目等已

於閏七月二十日抵省即兼程回省於八月初二

日到署來使郊外遠迎俯伏道左於初三日

臣隨

肅整威儀排列軍容令伊等進見內叭目三名先
目六名後生十五名列次叩頭臣傳通事獎勞來
使跪稟云南掌小國離

天朝最遠聞得黃河水清知

大聖人治世小國數年以來安享太平年年豐熟通歡
慶沐

皇上洪福國主感戴不盡特備土產象隻進貢以展下
情祈賜轉

奏親叩

闕廷等語

臣

即愷切開示宣佈

皇仁嘉獎恭順隨加犒賞令其回寓靜候訖

臣伏查老

撾係俗名南掌係國號方言以水為南以象為掌

因水上出象故名南掌即古之越裳氏僻處雲南

之極西與交趾緬甸交界其人民繁庶疆域遼闊

亦與兩國相等頭目名叭者職分極大該國止設

五六人今來使首名叭猛花即係掌兵者先目亦

係有職人負後生其土兵也自周成王時獻雉之後數千百年未聞入貢雖元明之初名屬內附然皆迫於壓制竝非出自諄誠未有不加兵威不事招致而自効恭順萬里遠來如

今日者也茲益恭遇我

皇上

光被四表

寧及萬邦

聲教無所不通囊括無雷之國

懷柔鮮有不至包涵出日之鄉重譯來朝

聖人興而萬方作覩梯航致貢

文德盛而四夷咸賓敬備

鳳闕之威儀不數貢契於西旅上供

鸞輿之鹵簿寧等獻翟於南淮不同赤雀蒼鳥徒勞

跋涉大異幢花蒟醬空耀珍奇較玉帛於塗山何

須誅防風之後至比共球於商代豈必責荆楚之

來王斯誠我

聖主德無不屆遠無不來風動時雍固無間於外域者

臣查雲南向無外國進貢成例而該國敬備

表文方物遣使來朝出於至誠據大頭目一名叭猛

花次頭目一名叭細里松發并先目二名先腊鮮

先籠後生五名波罕醒愠醒憎波亥莫博歪等懇

祈親叩

關廷情詞諄切臣謹會同雲南撫臣沈廷正合詞

題報恭候

諭旨臣即委負將該貢使伴送至京以昭

盛事伏祈

皇上睿鑒施行

平烏蒙謝恩疏

鄂爾泰

伏念苗猱之性比於犬羊即不激成亦時反覆總
兵官劉起元之罪猶不在僨事而在辱國以全鎮
之兵加以所轄三營軍有鎗砲賊只標弩以一當

十非闖弱強無論未事之先首告造謀者有人密
報聚衆者有人劉起元責懲怒罵既不究察亦不
防備罪不容於誅即果變起倉猝原無知覺亦當
整兵力戰或據險待援勝則賊降敗則自盡猶不
失為死事乃竝不一戰妄欲招安直至逆猱重圍
兇橫益甚猶妄意魯甸不反仍同遊擊江仁賄買
賊目欲保全家口奔赴東川致盡被殺於離城二
十里荔枝河地面於是賊勢愈熾謂官兵伎倆不

過如此以致東城猱屬羣起附和肆布流害人心
惶惑據奔逃兵丁客民備述形狀莫不痛心切齒
在鎮將之罪即總督之罪此臣之所以慚惶忿恨
而刻難自寬也雲貴邊隅盡屬苗猱獷悍愚頑不
服約束每有藐官虐民殺兵奪砲而互相隱諱以
為老成者凡茲前事人所習聞臣自叨荷

殊知寄以重任殫心籌畫矢志清除不量己力不恤人
言竝非好大喜功實亦隱憂遠慮計五載以來仰

賴

天威凜遵

訓示雖難言條理已少具規模今烏蒙一變儼若不支
惟

聖明可寬臣之罪天下誰諒臣之心將懦者得以藉口

強者亦樂於安身謂苗獮原不應懲創謂邊疆原
不必開闢皆鄂爾泰好事皆鄂爾泰啟釁竊恐因
循瞻顧復蹈前轍日復一日官復一官數十年後

或有事征勦則力倍功半猶未可以圖寧事有原
因誰實貽戚臣即骨化形銷無辭負恩誤國言念
及此寤寐難安故烏蒙逆猱務期立速屠滅俾

聲威遠震免生夷心以堅衆志庶此一反覆轉可以
謀寧謐慮不止為烏猱事實攸係諸蠻此臣之所
以懇請解任督師不欲旁貸者也茲蒙

聖恩原宥慈諭屢頒臣自知淺陋不能仰體

天心冒昧無辭悚惶倍切至於遊擊汪仁知縣賽枝大

等倉猝遇害累及妻孥著臣查明具奏加恩賞恤
捧讀

恩綸感深存歿臣現查烏蒙文武各員內有効死盡命
者有奔逃被殺者有牽累遇害者有衝突苟活者
有在外無恙者有因遠倖免者其効死盡命時則
遊擊劉崑馬秉倫把總周世美等忿激殺賊各帶
重傷陣亡又司獄陳天錫見鎮將不戰於先二日
即手刃其妻妾自刎於官署此四員者忠義凜凜

堪膺賞恤如遊擊汪仁守備楊天增千總李發早
卽士奇把總張必弘王永福外委千總王起鰲王
國卿等係奔逃被殺俱無可矜憐如通判劉鎮寶
署知縣賽枝大教授李焜知事劉懋美巡檢葉祚
徽係牽累遇害俱堪賞恤如守備金必信丞茂崇
千總王家彥蔡之斌把總卜貴汪玉丁蕃劉士俊
賴君翼等俱初係奔逃繼衝突苟活者俱應革職
究擬因現在軍前効力贖罪俟事竣再議如烏蒙

知府陳克復永善知縣杜思賢因公在省署經歷
胡珣教諭趙霽先委辦差千總蔣功成養病住威
把總李龍施弘義差接家口俱在外無恙如典史
厲錦巡檢魯進修把總陳聯科鄧又禹俱因遠得
免其該鎮兵丁現出隨營者已一千二百餘名仍
有陸續投到者尚無確數至於遇害諸文員多未
攜帶妻孥有遊擊劉崑之妻張氏見劉崑傷亡逆
衆兇橫遂顧謂二女曰我為命婦汝為官女豈可

辱賊乎惟一死以報君恩遂殺其二女時有子僅三歲張氏囑其生子之妾吳氏汝尚可勿死撫此子以存劉氏後語畢即自殺妾不受亦自殺及恢復烏蒙後按獲劉崑之子竝乳母婢僕共五口臣聞信隨令護送至省親視撫養劉崑尚有胞弟武生劉峨義子武舉劉類先俟事少定當資送回籍仍咨明四川撫臣囑加意照看以為忠義者勸其遊擊汪仁之妻竝子女僕婢等遊擊馬秉倫之妻

竝僕婢等又守備巫茂宗之妻把總汪王之妻及
兵丁家口各男婦等共按獲五百餘人現已分養
周恤均勿令失所雖大節有虧生死俱無闕輕重
而至仁普冒鄙賤皆不外生成臣實切感傷亦愈
深慚愧謹

奏

按疏內楊天增李發早帥士奇張必弘王國卿五
人後復查明俱係死事另疏具題一體賜恤

賜書謝恩疏

鄂爾泰

為恭謝

天恩事雍正八年十一月初三日郵差齎捧

頒賜臣

欽定詩經傳說彙纂二部春秋傳說彙纂二部

御纂性理精義二部抵滇臣隨郊迎至署恭設香案望

闕叩頭謝

恩祇領訖竊惟厚風俗以正人心教莫先於風雅尊天德而崇王道義最著於春秋總皆淑性之書無非會理之要故啟心傳者只十六字而衍妙緒者遂

千萬言均為百世之津梁豈獨羣臣之模範欽惟
我

皇上

大孝通神

至誠贊化

憲章

聖祖表彰聖籍知

聖聖之相承

闡揚心法追溯心源仰心心之是紹邇自開基仁厚
化始二南欲知祚永商周功推三頌幽堂觥酒十
五國之遺事猶存鎬邑鼓鐘八百年之餘音如在
至於體元居正為臨御之大經法祖尊王尤國家
之要典三綱已定專藉微言九法既明用伸大義
雖四傳黨同伐異均堪以熄邪思就諸家略短取
長皆足以維王迹不辭彙粹之力開天以啓蒙用
成纂輯之功牖民而覺世迨至周程張邵遠接洙

泗之心傳下及游謝呂楊近窺濂洛之寶笈既幸
宋賢崛起得朱子以集其成復覩元儒嗣興至明
初而會其說名為性理裒然成編統曰大全亦稱
美備然醇駁相間不免於小疵攬撫太繁或鄰於
寡當欲求精義端賴

睿裁茲者仰蒙

聖賜自九重而下錫歸然三書爰是俯竭臣愚從五夜
以研求豁如一貫三百諷咏美刺具而知賞罰所

由生一字褒誅榮辱分而覺興觀之咸備繹風人之旨無非本天理以導人情秉素王之權亦惟藉書法以開至性按其篇簡雖多寡之攸殊原其指歸只萬一之各正倘冀合同而化先須分類以求臣箋愧康成解慚杜預趨庭未學豈曾問業於西河執簡末由寧望贊辭於東魯問天人祕奧罔敢曰知探性命正宗志焉未逮念忠臣孝子思婦勞人凡正變貞淫貌焉乾坤中處要期體胞與於西

銘觀五禮六樂八伐九征即中外安攘任其動靜
互根總願渾陰陽於太極叨承

聖主時聞歌鹿鳴之三受賜

天王豈止錫彤弓者一惟

一人達天窮理書正月而同歌

萬壽無疆將四海率性怡情紀有年而恒聞農夫綏慶

臣無任激切屏營踴躍懼忤之至謹具疏恭謝

天恩伏乞

皇上睿鑒施行

請添設烏鎮弁兵疏

鄂爾泰

為東蒙蕩定威鎮安平請增營添兵以垂久遠事
竊照烏蒙一鎮舊制中左右三營領兵二千八百
名而威寧鎮雄東川三營又各兵一千名分佈聲
援原不甚單弱祇緣鎮將庸劣疎於操防兼因奸
賊蓄謀出乎意外遂致變起倉卒搖動三邊今雖
仰賴

天威剋期勦滅惡首兇黨盡數就擒然種類繁多邊隅
險遠善後事宜尤不敢不熟慮臣查大關永善舊
係左右兩營汎地皆緊接川蠻而甕迭伐烏米貼
豆沙等處俱屬險要近又准文以金沙江為界而
永善一縣新增副官村等處大關地方新增鐘潭
溪等處較前愈加遼闊分防已覺不敷其涼山魯
甸一帶舊係中營汎地逼近牛欄江潛通川界及
東川之巧家營陰分防外存城兵亦無多應請照

廣西左江鎮之例准添一營設中前左右四營每
營設遊擊一員守備一員千總二員把總四員馬
一步九兵一千一百名左營遊擊帶守備一員千
總一員把總四員外委千把六員馬步兵丁一千
名仍駐防大關地方內撥把總一員外委把總一
員帶兵一百名分防免勒以通府城聲息又撥把
總一員外委把總一員帶兵一百二十名分防豆
沙關兼防鹽井渡再撥千總一員外委把總一員

帶兵一百五十名分防濫田壩兼防牛皮寨一應塘卡照舊安設其餘守備一員把總二員外委千把三員兵丁六百三十名俱隨遊擊駐劄大關城內并聽輪委遊巡鐵線溪灘頭汎鐘潭溪等處右營遊擊帶守備一員千總一員把總四員外委千把六員兵一千名仍駐防永善縣地方內撥守備一員把總二員外委把總二員帶兵三百八十名分防吞都即於內撥把總一員帶兵八十名分汎

檜溪撥把總一員帶兵六十名分汎副官村其米
貼一汎另撥把總一員外委把總一員帶兵一百
名分防守禦一應塘卡照舊安設其餘千總一員
把總一員外委千把二員兵丁五百二十名俱隨
遊擊駐劄永善縣城內并聽輪委遊巡自沙河至
永善一帶地方新添之前營遊擊帶守備一員千
總一員把總四員外委千把六員兵一千名應駐
防涼山地方內撥守備一員把總一員外委千把

各一負帶兵三百名分防魯甸并火得紅江邊與
東川聯絡又撥把總一負外委把總一負帶兵一
百名分防烏威接壤之諸仙背以司盤查又撥把
總一負帶兵八十名分汛切黑蘇甲以扼江口要
隘又撥外委千總一負帶兵六十名分防苦著以
連涼山聲勢其餘千把總各一負外委千把各一
負兵丁四百六十名隨遊擊駐劄涼山營內竝控
制沿江川蠻輪撥防汛安塘中營官弁兵丁俱應

駐劄府城不須分撥防汎其左右前三營尚餘千
總各一員兵丁各一百名亦併留駐府城聽總兵
官差操竝資本營傳事是三營汎地既星羅碁布
呼吸相通而總兵駐劄府城有遊守各一員千把
總共九員外委千把六員兵丁共一千四百名彈
壓調遣皆可足用以上四營計添兵一千六百名
共額兵四千四百名即除算鎮將備弁親丁糧及
公費糧等項亦尚有足兵四千名地方縱屬遼闊

實無單弱之虞矣再鎮雄東川二營現各設叅將
一員守備一員千總二員把總四員馬步兵丁一
千名僅足防守難資應援應請於鎮雄東川各添
設守備一員把總二員馬步兵丁二百名合舊額
分為左右軍以鎮雄營右軍守備一員千總一員
把總二員外委千把各一員帶兵四百名駐防奎
鄉內撥千總一員外委把總一員帶兵一百名分
防白水三江又撥把總一員外委千總一員帶兵

八十名分防伐烏關其餘汎地除酌量安設外所
餘左軍守備一員及千把外委兵丁俱隨叅將駐
劄鎮雄州城以資彈壓以備調遣以東川營右軍
守備一員千總一員把總二員外委千把各一員
帶兵三百名駐防巧家營之阿白溪內撥千總一
員外委把總一員帶兵一百名分防者那把守牛
欄金沙兩江通川烏渡口所餘汎地除酌量安設
外所餘左軍守備一員及千把外委兵丁俱隨叅

將駐劄東川府城以資彈壓以備調遣再查鎮雄
營舊設有彝良吼西長官司迴龍溪等汛如龍街
子核桃坪羅坎關卻左等處則俱應添汛而應設
之塘卡共二十餘處東川營舊設有阿汪五龍索
橋者海則補弩革巧家營老吾老等汛如那姑以
扯待補七里馬書等處則俱應添汛而大水塘小
龍潭現擬割歸尋甸猶不在內此中應增應減應
併應分仍恐疎漏未便驟定統俟再加詳勘另造

清冊報部查核如是庶鎮雄東川營制周密而鎮
府攸賴矣至於威寧地方係烏鎮唇齒為川滇咽喉
叅將一員守備一員千總二員把總四員額兵
一千名除分防外微覺單弱應請改營為協仍屬
鎮轄裁去叅將設副將一員添都司一員千總二
員把總四員馬步兵丁五百名合舊額官兵共一
千五百一十五員名分為左右兩營新添之都司
為左營兼管中營事舊有之守備為右營兵各七

百五十名撥右營守備一員千總一員把總一員
帶兵二百八十名駐防雄所以通鎮雄內撥把總
一員帶兵八十名分防長勝寨以通烏蒙又撥右
營千總一員帶兵一百名分防瓦渣河以通東川
又撥左營把總一員帶兵六十名分防可渡橋以
通宣威再撥右營把總一員帶兵六十名分汎四
舖撥左營把總四員各帶兵六十名分防水槽舖
菩薩塘黑草結裏等四處外委千把酌量分撥一

應塘卡嚴緊安設以上除分撥防汎外駐劄威寧
城內副將一員都司一員千總二員把總一員并
外委兵丁七百六十五員名庶彈壓調遣亦皆足
用而合計四府州一鎮所轄一協兩營新添兵二
千五百名共額兵八千三百名則不獨滇黔邊隅
可保寧貼即涼冕川蠻亦知所做懼矣再曲靖府
屬之尋甸一州雖係內地實為東川烏蒙扼要之
區應另設一營以備策應查雲南省城除城守外

督撫兩標額兵六千六百名儘可分撥應請於督
標撥兵八百名撫標撥兵二百名共馬步兵一千
名移駐尋甸設叅將一員守備一員千總二員把
總四員分哨管領仍歸臣標統轄名為奇兵營將
東川之大水塘小龍潭二處割歸汎防竝於尋屬
之功山尹伍倘甸等處分汎防守其曲尋鎮原防
尋甸之兵三百一十名移駐羅平合原防羅平之
兵五百九十五名共馬步兵九百零五名應接安

籠防閑粵境庶通盤合算皆可備聲援而資控制
即遠近苗獠亦可潛消其窺伺矣以上各條如蒙

聖恩俞允新改新添之副將叅將都司請

勅部鑄給關防新添之千把容臣於奮勇効力之弁兵

內考拔除應添各員并烏蒙鎮標現在各員缺一

面另疏具


題恭候

聖旨外臣謹會同雲南巡撫臣張允隨駐劄大理府雲

南提督臣哈元生貴州巡撫臣張廣泗駐劄安順
府貴州提督臣楊天縱合詞具

題伏乞

皇上睿鑒勅部議覆施行



雲南通志卷二十九之五